

UNIVERZITET U BIHAĆU

UNIVERSITY OF BIHAC



**PRAVILNIK O IZBORU U NAUČNO-NASTAVNA I SARADNIČKA ZVANJA NA
UNIVERZITETU U BIHAĆU**

Bihać, 2026.

Na osnovu člana 95. stava 1. Zakona o visokom obrazovanju na području Unsko-sanskog kantona ("Službeni glasnik Unsko-sanskog kantona", broj 26/24), Zakona o Univerzitetu u Bihaću ("Službeni glasnik Unsko-sanskog kantona", broj 24/17) i člana 63. stava 1. tačke d) Statuta Univerziteta u Bihaću (broj: 06-1782/2025), Senat Univerziteta u Bihaću (u daljem tekstu: Senat) na svojoj CXVII (stosedamnaestoj) redovnoj sjednici održanoj dana 30.4.2026. godine, donosi

PRAVILNIK O IZBORU U NAUČNO-NASTAVNA I SARADNIČKA ZVANJA NA UNIVERZITETU U BIHAĆU

I OPŠTE ODREDBE

Član 1.

Ovim se Pravilnikom propisuje postupak i uslovi izbora akademskog osoblja u odgovarajuće zvanje na Univerzitetu u Bihaću (u daljem tekstu: Univerzitet), te postupak i uslovi imenovanja i rada Komisije za pisanje izvještaja za izbor u naučno-nastavna i saradnička zvanja.

Član 2.

Univerzitet vrši izbor u naučno-nastavna i saradnička zvanja u skladu sa Zakonom o visokom obrazovanju na području Unsko-sanskog kantona, Zakonom o Univerzitetu u Bihaću, Statutom Univerziteta u Bihaću (u daljem tekstu: Statut) i ovim Pravilnikom.

Član 3.

Postupak izbora u zvanje provodi se:

- ako nastavniku ili saradniku ističe izbor,
- ako je nastavnik ili saradnik stekao uslove za napredovanje u više zvanje,
- ako postoji potreba za nastavničkim ili saradničkim mjestom.

II NAUČNO-NASTAVNA I SARADNIČKA ZVANJA I USLOVI ZA IZBOR U ZVANJE

Član 4.

(1) Naučno-nastavna zvanja na Univerzitetu su:

- a) redovni profesor;
- b) vanredni profesor;
- c) docent.

(2) Saradnička zvanja na Univerzitetu su:

- a) lektor;
- b) viši asistent;
- c) asistent.

Član 5.

- (1) Uslovi za izbor nastavnika u naučno - nastavno zvanje redovnog profesora su da:
 - a) ima proveden najmanje jedan izborni period u zvanju vanrednog profesora,
 - b) ima najmanje osam naučnih radova iz oblasti za koju se bira objavljenih u relevantnim naučnim publikacijama, nakon sticanja zvanja vanrednog profesora, od čega najmanje 5 radova mora biti objavljeno u svojstvu samostalnog autora ili prvog autora,
 - c) ima najmanje dvije objavljene knjige/udžbenika nakon sticanja zvanja vanrednog profesora, pri čemu najmanje jedna knjiga/udžbenik mora biti samostalna autorska knjiga/udžbenik, dok druga knjiga/udžbenik može biti koautorska, uz obavezno priloženu potvrdu koautora o individualnom naučnom doprinosu kandidata, iz koje jasno proizilazi razgraničenje doprinosa kandidata u odnosu na doprinos dugog/drugih koautora,
 - d) ima učešće u najmanje jednom domaćem ili međunarodnom projektu nakon sticanja zvanja vanrednog profesora,
 - e) ima uspješno realizirano mentorstvo kandidata za stepen trećeg ciklusa nakon sticanja zvanja vanrednog profesora.
- (2) Uslovi za izbor nastavnika u naučno - nastavno zvanje vanrednog profesora su da:
 - a) ima proveden najmanje jedan izborni period u zvanju docenta,
 - b) ima najmanje pet naučnih radova iz oblasti za koju se bira objavljenih u relevantnim naučnim publikacijama, nakon izbora u zvanje docenta, od čega najmanje 3 rada moraju biti objavljeni u svojstvu samostalnog autora ili prvog autora,
 - c) ima objavljenu jednu knjigu/udžbenik kao samostalni autor ili patent, odnosno originalni metod u odgovarajućoj naučnoj oblasti, priznat kao zaštićena intelektualna svojina, nakon izbora u zvanje docenta,
 - d) ima učešće u najmanje jednom domaćem ili međunarodnom projektu nakon sticanja zvanja docenta,
 - e) ima uspješno realizirano mentorstvo kandidata za stepen drugog ciklusa.
- (3) Uslovi za izbor nastavnika u naučno - nastavno zvanje docenta su:
 - a) ima naučni stepen doktora nauka u odgovarajućoj naučnoj oblasti,
 - b) ima najmanje tri naučna rada iz oblasti za koju se bira objavljenih u relevantnim naučnim publikacijama,
 - c) pokazane nastavničke sposobnosti.

Član 6.

- (1) Kod izbora u naučno-nastavna zvanja, kao relevantni, uzimaju se radovi objavljeni u publikacijama navedenim u Pravilniku o kategorizaciji publikacija Univerziteta u Bihaću.
- (2) Ocjenu relevantnosti objavljenih radova vrši komisija za izbor u naučno-nastavna zvanja.
- (3) Relevantnim radom, u smislu stava (2) ovog člana, podrazumijeva se rad objavljen iz uže naučne oblasti na koju se kandidat bira.
- (4) Patent podrazumijeva da je registrovan kod Instituta za intelektualno vlasništvo BiH ili inostranog ureda za patente.
- (5) Originalna metoda podrazumijeva da je priznata od relevantne ustanove.

Član 7.

- (1) Pod projektom se podrazumijeva skup koordiniranih aktivnosti, za koje je unaprijed utvrđeno vrijeme trajanja, sa ciljem da se kreiraju jedinstveni ishodi/rezultati, za koje su planirani resursi (projektni tim i infrastruktura), kao i prihodi i rashodi, te njihova namjena za ostvarivanje ciljeva projekta.

(2) Domaći projekat je onaj čija je realizacija finansirana/sufinansirana iz vlastitih sredstava i/ili sredstava fondova/institucija u Bosni i Hercegovini.

(3) Međunarodni projekat je onaj čija je realizacija finansirana/sufinansirana iz sredstava međunarodnih fondova/međunarodnih institucija.

(4) Pod učešćem u domaćem ili međunarodnom projektu se podrazumijeva da je kandidat učestvovao u projektnim aktivnostima pod afilijacijom Univerziteta uz priloženo rješenje Univerziteta o učešću na projektu.

Član 8.

(1) Knjiga/udžbenik relevantan za izbor, treba da je:

- a) Recenzirana od strane najmanje 2 (dva) recenzenta izabrana u naučno-nastavno zvanje na odgovarajućoj naučnoj oblasti, na koju se publikacija odnosi;
- b) Objavljena u punom obimu u štampanoj ili elektronskoj formi;
- c) Katalogizacija izvršena po međunarodnim ili domaćim standardima.

(2) U postupku izbora u zvanje uzimaju se u obzir samo knjige/udžbenici iz odgovarajuće naučne oblasti izbora.

Član 9.

(1) Ukoliko kandidat za napredovanje u zvanje redovnog profesora iz objektivnih razloga nije ispunio mentorstvo na trećem ciklusu, onda je kandidat dužan objaviti još dva rada u priznatim publikacijama, kao prvi autor, koje su indeksirane u citatnim bazama ili još dva realizirana mentorstva na drugom ciklusu, računajući od posljednjeg izbora.

(2) Ukoliko kandidat za napredovanje u zvanje vanrednog profesora iz objektivnih razloga nije ispunio uslov mentorstva na drugom ciklusu, onda je dužan objaviti još jedan rad u citatnim bazama, kao prvi autor, računajući od posljednjeg izbora.

(3) Radovi iz stava (1) i (2) ovog člana moraju biti objavljeni u naučnim časopisima sa liste relevantnih indeksnih baza podataka Akademije nauka i umjetnosti Bosne i Hercegovine s impakt faktorom (IF).

(4) Ocjenu relevantnosti radova, objavljenih u citatnim bazama vrši komisija za izbor u naučno-nastavna zvanja.

(5) Objektivni razlozi za neispunjavanje uslova mentorstva iz stava (1) i (2) ovog člana su:

- a) ako na fakultetu nije organiziran studij drugog i trećeg ciklusa, odnosno postdiplomski studij;
- b) ako nijedan kandidat nije prijavio temu magistarskog ili doktorskog rada iz naučne oblasti za koju se vrši izbor;
- c) ako zbog broja kandidata u datom vremenskom periodu kandidat za izbor u određeno akademsko zvanje nije određen za mentora.

Član 10.

(1) Pod pokazanom nastavničkom sposobnosti, kao uslov za izbor u nastavnička zvanja, podrazumijeva se iskustvo u nastavnom radu na visokoškolskoj ustanovi u trajanju od najmanje jednog izbornog perioda u saradničkom zvanju.

(2) Kandidat koji nije ranije učestvovao u realizaciji nastavnog procesa na visokoškolskoj ustanovi obavezan je pred studentima i komisijom održati pristupno predavanje iz nastavnog predmeta, odnosno naučne oblasti za koje je konkurisao.

Član 11.

- (1) Nastavno-naučno vijeće (u daljem tekstu: NNV) fakulteta imenuje komisiju za podnošenje izvještaja o prijavljenom kandidatu koji ranije nije izvodio nastavu u visokoškolskim ustanovama.
- (2) Komisija iz stava (1) ovog člana se sastoji od najmanje tri nastavnika iz naučnog polja, od kojih je najmanje jedan iz uže naučne oblasti za koju se nastavnik bira.
- (3) Članovi komisije iz stava (1) ovog člana su u istom ili višem zvanju od zvanja u koje se kandidat bira.
- (4) Komisija iz stava (1) je obavezna javno oglasiti vrijeme održavanja pristupnog predavanja na web stranici fakulteta.
- (5) Komisija iz stava (1) ovog člana u roku od 30 dana od dana imenovanja u obavezi je podnijeti izvještaj sa pozitivnom ili negativnom ocjenom o pristupnom predavanju.
- (6) Ocjena o pristupnom predavanju se donosi većinom glasova članova komisije. Ukoliko jedan od tri člana izdvoji mišljenje, dužan je isto obrazložiti i jasno navesti razloge zbog kojih se ne slaže sa zaključkom ostalih članova komisije.
- (7) NNV fakulteta razmatra izvještaj komisije iz stava (1) ovog člana i, ukoliko je ocjena pristupnog predavanja negativna, obustavlja izborni postupak i o tome izvještava kandidata.
- (8) Ako NNV fakulteta usvoji izvještaj komisije iz stava (1) u kojem je ocjena pristupnog predavanja pozitivna, isti se dostavlja komisiji za pripremanje prijedloga za izbor u zvanje i čini dio konkursne dokumentacije.

Član 12.

- (1) Uslovi za izbor u saradničko zvanje lektora su:
 - a) Kandidat ima završen drugi ciklus studija, odnosno ima naučni stepen magistra nauka iz odgovarajuće naučne oblasti;
 - b) Izbor u zvanje lektora se može vršiti za užu naučnu oblast ili nastavni predmet strani jezik, koji se na Univerzitetu studira kao obavezni nastavni predmet.
- (2) Uslovi za izbor u saradničko zvanje višeg asistenta su:
 - a) Kandidat ima završen drugi ciklus studija, ili integrirani studij prvog i drugog ciklusa, odnosno ima naučni stepen magistra nauka iz odgovarajuće naučne oblasti;
 - b) Ostvarena najniža prosječna ocjena 8,0 ili 3,5 na drugom ciklusu studija, ili integriranom studiju prvog i drugog ciklusa, odnosno postdiplomskom studiju;
 - c) Odbranjen završni rad (master ili magistarski rad) iz oblasti izbora u slučaju kada se kandidat po prvi put bira u saradničko zvanje;
 - d) Poznavanje jednog svjetskog jezika, najmanje srednjeg nivoa, ako se prvi put kandidat bira u ovo zvanje.
 - e) Pri napredovanju u saradničko zvanje višeg asistenta, kandidat se bira u naučnu oblast u kojoj je prethodno bio izabran u zvanju asistenta. Ako se ukaže potreba za promjenom naučne oblasti, kandidat može biti izabran u zvanje višeg asistenta u novoj oblasti samo ukoliko ispunjava uslov iz tačke c) ovog stava.

- (3) Uslovi za izbor u saradničko zvanje asistenta su:
- a) Kandidat ima završen prvi ciklus studija sa najmanje 240 ECTS bodova iz odgovarajuće naučne oblasti;
 - b) Ostvarena najniža prosječna ocjena u toku studija od 8,0 ili 3,5;
 - c) Poznavanje jednog svjetskog jezika, najmanje srednjeg nivoa.
- (4) Izuzetno od stava (2) i (3) ovog člana, uslov za izbor saradnika na kliničke predmete iz oblasti medicinskih nauka je i stručni stepen specijaliste iz odgovarajuće oblasti na koji se kandidat bira.
- (5) Kao dokaz o poznavanju svjetskog jezika, pri izboru u zvanje asistenta i višeg asistenta, priznaje se Uvjerenje Centra za jezike Univerziteta ili certifikat verifikovane škole stranih jezika ili uvjerenje o položenom stranom jeziku na visokoškolskoj ustanovi.

Član 13.

- (1) Period na koji se bira akademsko osoblje na univerzitetu je:
- a) asistent – na period od četiri godine bez mogućnosti ponovnog izbora;
 - b) viši asistent – na period od pet godina s mogućnošću jednog ponovnog izbora isključivo ako postigne stepen trećeg ciklusa;
 - c) lektor – na period od pet godina s mogućnošću ponovnog izbora bez ograničavanja broja izbora;
 - d) docent – na period od pet godina s mogućnošću jednog ponovnog izbora;
 - e) vanredni profesor – na period od šest godina s mogućnošću jednog ponovnog izbora;
 - f) redovni profesor – trajno.

Član 14.

- (1) Akademsko osoblje zaključuje ugovor o radu s visokoškolskom ustanovom na određeno vrijeme i to na period na koji je izabran, osim redovnog profesora koji zaključuje ugovor o radu na neodređeno vrijeme.
- (2) Sticanje prava na izbor u viša zvanja (vanrednog i redovnog profesora) može se steći i prije predviđenog izbornog perioda, ukoliko kandidat ispunjava sve uslove predviđene članom 91. stav (1) Zakona o visokom obrazovanju USK, s tim da kandidat mora provesti u zvanju iz kojeg se bira najmanje 50% izbornog perioda.
- (3) Sticanje prava na izbor u viša zvanja (vanrednog i redovnog profesora) prije predviđenog izbornog perioda ne može se steći primjenom članom 91. stav (2) Zakona o visokom obrazovanju USK.
- (4) Prilikom izbora u isto ili više zvanje uzimaju se u obzir samo objavljeni radovi, knjige i rezultati vlastitih istraživanja u primjeni, projekti, te mentorstva u vremenu od posljednjeg izbora.
- (5) Prilikom izbora u isto zvanje nastavnik mora ispuniti minimalno 50% uslova koji su propisani za izbor u više zvanje i to:
- a) Za izbor u isto zvanje docenta, nastavnik mora ispuniti u potpunosti najmanje dva uslova od ukupno četiri uslova predviđenim članom 5. stav (2) u tačkama b), c), d) i e) ovog Pravilnika;

- b) Za izbor u isto zvanje vanrednog profesora, nastavnik mora ispuniti u potpunosti najmanje dva uslova od ukupno četiri uslova predviđenim članom 5. stav (1) u tačkama b), c), d) i e) ovog Pravilnika.
- (6) Akademskom osoblju u zvanju asistenta moguće je produžiti saradnički staž u trajanju od dvije godine nakon isteka postojećeg izbornog perioda, uz uslov da su upisali drugi ili treći ciklus studija.
- (7) Akademskom osoblju u zvanju višeg asistenta moguće je produžiti saradnički staž u trajanju od tri godine nakon isteka postojećeg izbornog mandatnog perioda, uz uslov da su upisali treći ciklus studija ili prijavili doktorsku tezu.
- (8) Akademskom osoblju u radnom odnosu na Univerzitetu, koji su ispunili uvjete za napredovanje u više zvanje u toku izbornog perioda, a nije bilo moguće okončati proceduru napredovanja do isteka izbornog perioda, produžit će im se izbor u zvanje, kao i radni odnos, na period do okončanja procedure izbora u zvanje - napredovanje, a najduže do šest mjeseci.
- (9) Akademskom osoblju u radnom odnosu na Univerzitetu koje je okončanjem doktorske disertacije steklo uvjete za napredovanje u nastavno zvanje docenta, moguće je produžiti izborni period višeg asistenta do osiguranja pune nastavne norme za odgovarajuću oblast izbora.

Član 15.

- (1) Rokovi izbora u akademsko zvanje utvrđeni Zakonom o visokom obrazovanju, produžit će se za:
- a) Vrijeme provedeno na porodiljskom odsustvu, odsustvu radi njege djeteta (postporodiljsko);
 - b) Neprekidno bolovanje duže od tri mjeseca;
 - c) Neprekidno plaćeno i neplaćeno odsustvo radi stručnog usavršavanja duže od tri mjeseca;
 - d) u drugim naročito opravdanim slučajevima predviđenim Zakonom ili općim aktom Univerziteta.
- (2) Nastavnik i saradnik imaju pravo na mirovanje rokova za izbor u akademski zvanja i na mirovanje prava i obaveza iz radnog odnosa, u vrijeme dok obavlja javnu funkciju.

III POSTUPAK IZBORA U ZVANJE

Član 16.

Prijedlog za pokretanje postupka za izbor u više ili isto zvanje pokreće se na zahtjev nastavnika/saradnika, a dalje se provodi na način utvrđen Statutom Univerziteta i ovim Pravilnikom.

Član 17.

- (1) Zbog isteka perioda na koji su nastavnici i saradnici izabrani, ili zbog potrebe Univerziteta za većim brojem nastavnika i saradnika u naučno-nastavnom procesu, pokreće se postupak za izbor nastavnika i saradnika.
- (2) Postupak izbora nastavnika i saradnika, u isto ili više zvanje, pokreće se u zadnjoj godini izbora a najkasnije 6 šest mjeseci prije isteka izbornog perioda.

(3) Ukoliko kandidat ne podnese zahtjev za izbor/napredovanje u roku iz stava (2) ovog člana, dekan je dužan u narednih 30 dana dostaviti pisani akt o statusu radnika u kadrovsku službu Univerziteta.

Član 18.

(1) Izbor nastavnika i saradnika vrši Senat.

(2) Dekan fakulteta, u roku utvrđenom u stavu (2) člana 17. ovog Pravilnika, pokreće inicijativu za raspisivanje konkursa za izbor nastavnika i saradnika na nastavni predmet ili naučnu oblast i istu dostavlja NNV-u fakulteta, koji utvrđuje prijedlog odluke za raspisivanje konkursa i istu dostavlja Senatu.

(3) Uz prijedlog odluke o raspisivanju konkursa za napredovanje saradnika u zvanje docenta, dekan je dužan priložiti dokaz o osiguranoj osnovnoj normi.

(4) Dekan će pokrenuti inicijativu za napredovanje saradnika u zvanje docenta samo u slučaju kada postoji osigurana puna nastavna norma za nastavnika u radnom odnosu na Univerzitetu.

Član 19.

(1) Na osnovu dostavljenog prijedloga iz člana 18. ovog Pravilnika, Senat donosi odluku o raspisivanju konkursa za izbor u zvanje, kako slijedi:

- Javni konkurs za izbor nastavnika i saradnika koji prvi put zasnivaju radni odnos na Univerzitetu, zbog postojanja potrebe za nedostajućim akademskim osobljem i
- Javni konkurs za izbor u odgovarajuće naučno - nastavno ili saradničko zvanje, bez zasnivanja radnog odnosa.

(2) Konkurs se objavljuje na web stranici Univerziteta.

(3) Konkurs sadrži:

- opšte i posebne uslove koje kandidat treba da ispuni,
- biografija i bibliografija kandidata
- užu naučnu oblast, odnosno predmet za koji se vrši izbor,
- zvanje u koje se bira,
- rok za prijavu,
- dokumente koje kandidat prilaže kao dokaz za ispunjavanje uslova se dostavljaju na adresu naznačenu u konkursu.

(4) Rok za podnošenje prijave na konkurs iz stava (1) ovoga člana je 15 dana, računajući od dana njegovog objavljivanja.

Član 20.

(1) Zapisnik posebne komisije, koju imenuje NNV fakulteta na mandat od jedne akademske godine, za pregled dokumentacije, u smislu blagovremenosti, potpunosti i ispunjenosti uslova, u skladu s pravilnicima kojima su regulisani izbori u zvanja, razmatra i usvaja NNV fakulteta, u roku od tri dana po isteku roka za podnošenje prijave na konkurs.

(2) Dekan fakulteta pismeno obavještava one kandidate čije su prijave odbačene kao neblagovremene, nepotpune i/ili zbog neispunjavanja uslova u roku od sedam dana od dana usvajanja zapisnika iz stava (1) ovog člana.

(3) Na obavijest dekana fakulteta iz stava (2) ovog člana, kandidat ima pravo prigovora dekanu u roku od tri dana od dana prijema obavijesti.

(4) O prigovoru iz stava (3) odlučuje dekan u roku od tri dana od dana prijema prigovora.

Član 21.

(1) NNV fakulteta imenuje komisiju za pripremanje prijedloga za izbor u akademsko zvanje prijavljenih na konkurs, na prijedlog dekana.

(2) Komisiju iz stava (1) ovog člana čine najmanje tri nastavnika od kojih je većina iz uže naučne oblasti, odnosno nastavnog predmeta na koji se kandidat bira. Najmanje jedan od članova komisije je iz reda nastavnika sa izborom u zvanje sa drugog akreditovanog univerziteta, odnosno najmanje jedan od članova komisije je zaposlenik Univerziteta.

(3) Izuzetno, kada nije moguće sastaviti komisiju u skladu sa stavom (2) ovog člana, komisiju mogu činiti nastavnici iz srodne naučne oblasti za koju se kandidat bira, pod uslovom da NNV fakulteta u konkretnom slučaju utvrđuje srodnost naučnih oblasti.

(4) Ukoliko se kandidat bira u zvanje nastavnika, članovi komisije moraju biti u istom ili višem zvanju od zvanja u koje se kandidat bira.

(5) Članovi komisije za izbor saradnika su u zvanju docent, vanredni ili redovni profesor.

Član 22.

(1) Komisija za pripremanje prijedloga za izbor sačinjava zajednički izvještaj samo za one kandidate čije su prijave potpune i blagovremene, i dostavlja ga NNV-u fakulteta koje ju je imenovalo.

(2) Komisija priprema prijedlog iz stava (1) ovoga člana, u skladu sa obrascem (prilog 1.) koji je sastavni dio ovog Pravilnika.

(3) Ukoliko se na istu poziciju raspisanu na konkursu javi više od traženog broja kandidata koji ispunjavaju uslove za izbor u zvanje, komisija će predložiti kandidata sa većim brojem bodova, u skladu sa Odlukom o detaljnoj kategorizaciji i sistemu vrednovanja objavljenih radova i publikacija koja je na snazi.

(4) Na osnovu prijedloga komisije NNV fakulteta utvrđuje prijedlog za izbor i dostavlja ga Senatu.

(5) Senat je dužan je donijeti odluku o izboru ili neizboru u zvanje.

(6) O odluci o izboru se obavještavaju učesnici konkursa čije su prijave potpune i blagovremene, a kandidat koji nije zadovoljan istom, može podnijeti zahtjev za njeno preispitivanje Senatu, u roku od 15 dana od dana prijema obavijesti o izboru.

(7) Odluka Senata po zahtjevu iz stava (6) ovog člana je konačna.

(8) Odluka o izboru u zvanje se dostavlja radnicima Univerziteta, a vanjskim saradnicima se ne dostavlja, već se ulaže u njihov personalni dosje.

Član 23.

(1) Dekan fakulteta je odgovoran da se postupak za pripremanje prijedloga za izbor u zvanje nastavnika, odnosno saradnika provede u rokovima utvrđenim Statutom i ovim Pravilnikom.

(2) Ako se započeti postupak izbora u akademsko zvanje ne okonča u roku od šest mjeseci, računajući od dana raspisivanja konkursa, Senat će konkurs poništiti.

(3) U slučaju da se konkurs poništi krivicom člana Komisije iz reda radnika, Senat pokreće postupak za utvrđivanje teže povrede radne obaveze.

(4) U slučaju da se konkurs poništi krivicom člana Komisije koji nije u radnom odnosu na Univerzitetu, odlukom dekana neće biti angažiran u nastavnom i drugim procesima naredne dvije godine.

(5) U slučaju nepoštivanja rokova propisanih Statutom i ovim Pravilnikom koji mogu rezultirati poništavanjem konkursa, dekan je dužan Senatu podnijeti pisani izvještaj o razlozima za poništenje konkursa.

Član 24.

(1) Rokovi postupanja u proceduri izbora u zvanja:

- a) Po zaprimanju zahtjeva za pokretanje procedure izbora/napredovanja akademskog osoblja, dekan je dužan, u roku od najduže 15 dana zahtjev uputiti NNV-u fakulteta.
- b) Dekan je dužan prijedlog odluke NNV-a uputiti Senatu u roku od pet dana na prvu narednu redovnu sjednicu.
- c) Dekan je dužan osigurati raspisivanje konkursa, u roku od pet dana, po dobivanju odluke Senata.
- d) Po zatvaranju konkursa, dekan je dužan putem NNV-a imenovati Komisiju za pisanje izvještaja o izboru u zvanje u roku od sedam dana.
- e) Komisija u roku od 30 dana je dužna dostaviti potpisan izvještaj NNV-u fakulteta.
- f) Dekan je dužan osigurati da se izvještaj o izboru u zvanje razmatra na prvoj narednoj sjednici NNV-a fakulteta, a najduže u roku od 15 dana.
- g) Dekan je dužan prijedlog odluke NNV-a o izboru nastavnika/saradnika uputiti Senatu u roku od pet dana na prvu narednu redovnu sjednicu.
- h) Predsjednik Senata je dužan osigurati da se predmetni izvještaj sa prijedlogom odluke NNV-a uvrsti u dnevni red prve naredne redovne sjednice Senata, a najduže u roku od 30 dana.

Član 25.

Postupak izbora u zvanje neće se vršiti za kandidate koji su stekli jedan od uslova za penzionisanje u skladu sa pozitivnim zakonskim propisima koji regulišu tu oblast.

IV PRIZNAVANJE IZBORA IZVRŠENOG NA DRUGOM UNIVERZITETU

Član 26.

NNV fakulteta može prihvatiti izbor kandidata izvršen na drugom akreditovanom univerzitetu u BiH, zemljama bivše Jugoslavije i inostranstvu.

V PRELAZNE I ZAVRŠNE ODREDBE

Član 27.

Pravilnik o kategorizaciji publikacija i Odluka o detaljnoj kategorizaciji i sistemu vrednovanja objavljenih radova i publikacija (prilozi 2. i 3.) čine sastavni dio ovog Pravilnika.

Član 28.

- (1) Postupci izbora/izbora u isto zvanje pokrenuti prije stupanja na snagu ovog Pravilnika biće okončani po odredbama članova Zakona o visokom obrazovanju i Statuta Univerziteta u Bihaću koji regulišu ovu materiju, odnosno primjenit će se propis koji je povoljniji za kandidata.
- (2) Pod pokrenutim postupkom smatra se odluka NNV fakulteta o pokretanju izbora/izbora u isto zvanje.

Član 29.

- (1) Pravilnik o izboru u naučno-nastavna i saradnička zvanja na Univerzitetu u Bihaću donosi Senat Univerziteta u Bihaću.
- (2) Izmjene i dopune ovog Pravilnika donose se na isti način na koji je donesen ovaj Pravilnik.

Član 30.

Tumačenje odredaba ovog Pravilnika daje Senat Univerziteta u Bihaću.

Član 31.

Ovaj Pravilnik stupa na snagu i primjenjivat će se od početka akademske 2026/2027. godine i bit će objavljen na web stranici Univerziteta u Bihaću.

Broj:06–2284/2026


Bihać, 30.4.2026.



Predsjednik Senata


Prof. dr. Atif Hodžić

Na ovaj Pravilnik data je saglasnost Ministarstva obrazovanja, nauke, kulture i sporta USK, broj: 10-34-771-2/2026 od 23.03.2026. godine.



Predsjednik Senata


Prof.dr. Atif Hodžić